



Iethro vient voir son gendre Moÿse, qui vacque à iuger les differens du peuple.

VAND Iethro Prestre de Madian allié de Moÿse, eut entendu toutes les choses que Dieu auoit faites à son peuple, il print Sephora femme de Moÿse, avec Gersan & Eliezer ses deux fils, & vint à Moÿse, qui avec grande ioye les receut, lequel estant entré en son pauillon, luy raconta tout ce qui s'estoit passé depuis leur departement d'Egypte, & comme le Seigneur les auoit deliurez de la poursuite de Pharaon, dont Iethro esioüy benist le Seigneur, pour auoir fait tant de graces à son peuple, & luy en offrit holocaustes & sacrifices, & Moÿse, & Aaron, & les autres d'Israël, vindrent prendre leur repas avec luy. Le lendemain Moÿse tint siege pour iuger les differens du peuple, & y vacqua iusques au Vespere: dont Iethro le reprit, l'exhortant de n'entreprendre tant de charges, & qu'il seroit mieux fait s'occuper à chose qui concernoit les ceremonies pour reuerer Dieu, & le chemin qu'ils doiuent tenir, laissant iuger aux Centeniers & Dizeniers les moindres causes, en se reseruant celles de plus d'importance. Ces choses ainsi arrestées, Iethro s'en retourna en son pais.